


ル 5  
3150  
16





16  
門 5  
3150  
卷 16

黔南識略卷二十四

大定府

貴州巡撫長白愛必達撰

大定府在省城西北三百三十里古梁州荒裔漢屬  
牂牁西南境蜀漢建興三年丞相諸葛亮南征蠻長  
濟火獻糧通道以迎師佐擒孟獲有功世長其土已  
乃攻普里諸種拓其境地唐會昌中阿佩內附後唐  
天成二年羅甸普露靖率九部入貢宋開寶間有普  
貴者濟火三十六代孫也納土歸附仍襲其爵元至  
大元年阿畫歸附泰定間賜名帖木兒卜花至順元



黑南諸田卷二十四  
年加資善大夫雲南行省左丞後以軍功授順元等處宣慰使世居水西有爵土明洪武四年阿畫子靄翠與宋蒙友並皆以元宣慰司獻地歸附設治于會城仍各統所部居水西靄翠死妻奢香代襲開偏橋水東以達烏蒙烏撒及容山草塘諸境立龍場九驛子安的襲職因爲安氏自是子孫世襲宣慰司舊統四十八部部長曰頭目共設四十八目東接遵義南逾陸廣西連赤水北抵永甯延袤數百里天啟二年土同知安邦彥挾宣慰司安位以叛崇禎元年總督朱燮元討平之八年水西頭目臥這化沙爭襲各獻

地請設流朱燮元議設二十州分治其地各置副將鎮守十年仍其舊不設州

國朝順治十五年大兵取滇安坤爲嚮導授宣慰使司康熙四年安坤叛討平之設新疆三府以大方城爲大定府水西城爲黔西府比喇壩爲平遠府改烏撒爲威甯府二十二年改黔西平遠二府爲州二十六年改大定府爲大定州改畢節永甯二衛爲縣俱隸威甯府雍正八年割永甯縣屬四川復大定爲府改威甯爲州十一年移通判分駐水城共領水城一廳平遠黔西威甯三州畢節一縣設知府一教授一訓



導一經歷一其境東至貴陽府修文縣界二百三十里西至雲南東川府界五百二十五里南至安順府鎮甯州界二百六十里北至四川永甯縣界二百五十里東南至遵義縣界一百里西南至普安廳界三百八十里東北至遵義縣界二百五十里西北至雲南昭通府界五百四十里廣五百八十里袤六百八十里府親轄地方東至臥牛河塘接黔西州石革關界二百四十五里西至沙子坡接水城廳者猓箐塘界二百六十五里南至乾堰塘接黔西州西溪汎界六十里北至黎樹坪塘接畢節縣畢赤營界七十八

里東南至楠木溪塘接黔西州沙溪汎界六十里西南至青岡塘接平遠州猓隴橋界八十八里東北至大河口接四川敘永廳界二百三十里西北至奢東關接畢節縣猪場汎界一百一十五里廣四百八十里袤一百二十里郡境三面距蜀一面接滇復嶺重巒盤紆深阻說者謂北有畢節之赤水層臺可以塞蜀之門戶而結壘木稀當其衝西有威甯之石龍得勝可以扼滇之咽喉而屯兵于七星北鎮以截其要南有平遠之象鼻爲其藩籬水城之阿札爲其犄角東則有黔西之鴨池鬼箐爲其倚枕蓋居然四塞之



黑龍江通志卷之二十四  
黑龍江通志卷之二十四  
區設險而守者矣其府治境內北以雙山落折爲首  
東以九里箐烏西爲尾南有六歸比渡限于左西有  
裸濟木空環于右內依唇齒外連羽翼郡居腹心擁  
護旣周應援亦便措置最爲妥善黔中諸郡殆未有  
過之者也城爲明崇禎九年總兵方國安創築尋毀  
國朝康熙六年重建值兵燹傾圮乾隆十三年修建周  
九里三分計一千六百三十九丈高一丈五尺甃以  
石門五水關三府治山脉自西蜀過畢節北鎮蜿蜒  
而來矗爲城東北百里之九龍山巍峩萬仞高出雲  
表迤而南爲城東之五鳳山飛騰翔舞凝爲郡治勢

甚雄壯鳳山在城東三十里俗名公雞山山極高望  
見數百里外東二十里有鳳山對峙俗名母雞山五  
老山在城西三十里五峰拱向火焰山在城東南一  
里文龍山在城北一里上有寺下有靈塘荇藻不生  
產異草葉如蘭隨日影東西爲向背木葉飛墮鳥輒  
銜出雙山在城西北二十里大路旁夾聳爭高望如  
天闕萬松嶺在城東一里連山皆松柯駢接森若羽  
葆比渡坡在城東南五十五里渡六歸河而赴以列  
箐者必由此阿北壘在城西北二十里壘上寬可十  
里許有田土池塘周圍懸崖百餘丈鑿石通道劣纜



容足下繞長河上抵平遠巴浪界九里箐在城東十里大路由其中簸籬箐在城東四十里鬼箐箐在城西三十里茂林叢棘陡絕難登隴幾箐在城東北四十餘里地勢最爲深阻隴跨大箐在城東北五十里與黔西州接界楠木箐在城東北二百一十五里以列箐在城北十五里自遵義出水西必由此以達赤水烏蒙也涼風臺在城東南一里地最高爽暑日涼颶襲人穿洞在城東北一百里高廣三丈餘深三十餘丈桃源洞在城西南三里高數十丈廣如之洞口多桃樹旁有書卷巖落水洞眾水悉注于中泉聲戛

然紅崖洞在城西南五十里石色如塗朱康熙三年安坤之變我兵直入敗之于阿作洞又敗之于初得洞又敗之于紅崖洞坤率其妻祿氏奔木弄箐是也阿作洞在城西南七十里洞口有潭甚深以筏渡入可藏萬人閣鴉洞俗名牛皋子洞在城西北十五里連山劔立下臨閣鴉江方輿紀要引滇紀由閣鴉至大方洞凡三十有四而閣鴉最險又城南有崖底水洞深廣二十餘里仙洞在城東北十里水自洞出內有石亭角溪洞在城東北十里最深險又有險水洞阿母遮洞皆昔苗蠻據守處白土洞在城東北六十



里高大險峻可容萬人土人嘗避兵于內龜石在城東南十里土人嘗祈雨于此六歸河自威甯過畢節爲七星河入府西北境爲總機河伏流五里經天生橋出以列地方爲以列河稍南爲木空河明萬歷元年都御史蔡文親詣木空讞安智等獄不決卽此又經鼠仲地方爲鼠仲河又南爲係革河與落革河合爲六歸河下入平遠黔西界卽烏江上流也西有西溪烏西二河東有高家猓隴二河並落折總機凡六水共滙于府之南境疑六歸之名以此烏西河在城東二十里發源于府東南之龍潭出仲麥逕烏西塘

由架格入六歸河西溪在城東南六十里源出黔西逕府界入六歸河猓隴河高家河俱由平遠逕府境入六歸河落折河一名落腳河發源于畢節之龍洞兩山間破地吼出夏秋之交尤爲湍急逕城北小閣鴉大閣鴉諸山爲閣鴉河折而西逕城西南猓濟坡爲猓濟河至白鋪入六歸河隴溪在城東北一百五十里發源隴溪會安樂河出三重堰至黔西與湄河合入陸廣河皆烏江上流也郡地高而土瘠氣沴而候愆山嵐鬱蒸四時多雨及冬則白氣彌山漫入戶牖陰凝草樹望之皆雪柱冰車也故土人謂爲凌



城屋不可互受凍則毀以故茅屋居多轄樂貢悅服  
大有嘉禾義漸仁育六里雍正十一年將府屬之永  
順常平二里撥歸水城管轄原額成熟田一萬九千  
七百九十畝有奇減則新墾田九千四百六十六畝  
有奇又舊熟田一萬三百二十四畝有奇額徵本色  
米四千六十五石有奇除撥運威甯四百二十六石  
有奇府倉實徵米三千六百三十八石有奇支放協  
營兵米二千八百九十九石有奇廩生餼米一百六  
十石餘米變價批解糧庫隨丁銀一百四十二兩有  
奇常平倉實貯米一萬四千六百九十八石有奇社

倉米一百一十五石有奇漢莊苗寨共計二千五十  
八寨學額文武生皆二十名雍正九年撥文武各二  
名歸入水城現在文武各十八名乾隆十五年設文  
龍書院于南關外後移建城北更名萬松義學三營  
制自康熙三年設大定鎮原額兵一千五百名分爲  
三營雍正三年改鎮爲協裁兵五百名撥歸水城營  
移左營遊擊駐防水城乾隆七年裁兵二百名二十  
九年改爲左都右守嘉慶十九年裁兵七十六名道  
光十二年每百名裁汰二名實駐兵七百一十名  
城中駐劄大定協副將一員都司一員守備一員千



黔南諸田卷二十四  
總三員把總七員外委七員額外外委四員設三汛  
五十三塘樹饒梓漆桐橡桃李之屬蔬有竹筍香蓴  
果有花紅核桃烏梅卉有山丹杜鵑玫瑰繡球貨有  
馬氈而革器爲獨產錢局設于乾隆五十二年爐五  
座鼓鑄錢文搭配威甯大定平遠黔西水城畢赤安  
義永安長壩普安安南冊亨仁懷十三鎮協營廉餉  
除發爐匠工伙錢外每年支放各鎮協營廉餉錢一  
萬八千七百五十串有奇遇閏加增集場十有六水  
碓帕地方舊有鉛廠供四川採買及省局鼓鑄嘉慶  
元年四年額運不敷奉準停止今止供運定局鼓鑄

鉛八萬有奇額徵鹽稅銀一百一十一兩有奇雜稅  
銀一百一十八兩有奇遇閏加增又鹽雜稅羨銀一  
千三百八十兩關廂內外多豫章荆楚客民鄉則夷  
多漢少今之自謂土目者皆安氏裔也安氏自濟火  
以來世長其地一千四百年康熙四年安坤伏誅其  
妻祿氏子勝祖逃匿烏蒙十七年夷目阿武乘吳逆  
之變迎祿氏勝祖回水西復糾以賦等搶掠平遠黔  
西圍大定城十九年大兵恢復貴州勝祖遣阿武投  
誠自願助糧隨勦吳逆二十二年授勝祖水西宣慰  
司阿武長官司勝祖無嗣宣慰司遂廢阿武長官司



亦廢均係報畝入冊與齊民等無所謂土司亦無所謂土目也其支庶錯居府屬者沿其夷俗凡其祖報墾之田土悉歸長子承受名曰土目其或以私積別置田產者亦概謂之土目其等有九曰九扯最重曰更其次則慕魁勾魁罵色以至黑乍各有司事其服色與漢人無異土目有婚喪等事則斂派佃戶謂之派扯手甚至同里及附近田地之糧戶夷民有被其強壓者不從則捏爲叛佃訐控不休而爭繼奪產好鬪健訟之風彼此效尤近經懲創之後稍知斂迹至安氏從前所設之四十八目在府親轄境內者十有

五曰阿武曰阿戶曰化沙曰歸宗曰察革喇曰務卜底曰杓佐曰補露曰以膩曰總機曰以支曰以列曰得初曰黑拱曰羅氏其在府屬及水東者三十有三曰以個曰熊膀曰得素曰阿卦曰黑膀曰阿戈曰龍耳曰龍夜曰遮勒曰化那曰底飛曰租你架曰隴膀曰以馬曰阿世臥曰丙列曰納虎曰密受曰阿底曰糯膩曰者代曰郎白曰巴架曰阿烏謎曰阿個曰扒瓦曰阿坦曰巴底曰者社曰闊波曰納額曰歸集曰丙露今皆徒襲虛名而已苗有黑白猓猓狎家花苗蔡家儂家犴猪六額子弄子九種猓猓本盧鹿有黑



白二種黑者爲大族又名烏蠻卽安氏後也其人多  
深目長身黑面白齒薙髭而留髻以青布纏頭籠髮  
其中而束于額若角狀服麻布短衣寒則披白氈躡  
草履婦人辮髮亦用青布纏首大若箬笠綴以珠蚌  
螺殼耳帶大環垂至項深衣細摺長裙行則拖地其  
俗尙鬼有文字方形類蝌蚪書歲時皆用正朔婚用  
媒妁以牛馬爲聘食以木匙器用木碗名爲補肚殮  
用火葬招魂于野結松棚設靈幄謂之翁車椎牛野  
祭擊鼓吹喇叭親戚會葬者數百人謂之做憂凡薪  
米之屬悉背負善走躡懸崖捷于猿鳥平居畜善馬

好騎騁譎而健訟悍而喜鬪習攻擊尙氣力諺云水  
西羅鬼斷頭掉尾言其多且強也又每穿窬攘奪相  
習成風白猓獠又名白蠻與黑猓同而爲下姓狃  
家花苗蔡家儂家各屬俱有猓獠其種不一男女以  
幅布圍腰無裳積謂之桶裙花衣者曰花猓獠紅衣  
者曰紅猓獠又有打牙猓獠鍋圈猓獠各有族類不  
通婚姻婦人以青線束髮披青布囊綴海巴其上衣  
長尺許外襲方袍洞其中從頭籠下前短後長無袖  
其類矯而善奔輕生重黨觸之則糜沸得片肉卮酒  
卽捐軀與之六額子亦有白黑二種愚而多疑男子



黑南譜田卷二十四  
尖髻婦人長衣而無裙喪亦用棺歲餘合族至墓祭而取其骨刷洗至白爲佳囊以布埋之嗣後間歲一洗至七度乃止凡人家有病則謂祖先骨不潔云今經嚴禁惡俗漸革羿子身短小而悍男薙髮女飾髮以髡冠服尙白冬夏皆戴白氈笠樸者事耕鑿黠者往往行竊刻木爲約不通文字諸苗性皆嗜酒盛糟于罈插管于內以水灌罈而吸其竿名曰哂酒次第傳飲循環不輟不事商賈惟資牧養舊有九關曰青龍關曰那集關曰金魚關曰銅鼓關曰大弄關曰楊家關此六關今成坦途惟樂聚關卽今猓濟塘羿子

關卽今羿子塘以及上下天生橋烏西橋落折河六歸河木空河奢東關長巖雙山十處或兩山夾峙屹若雙關或陡崖壁立一水中隔或林深箐密伏莽可虞俱峻險扼要之所稽察尤宜周焉

論曰大定所領一廳三州一縣今爲西北之藩籬昔皆羅甸之巢穴也明時屢動大師旋創旋熾我

朝以十三鎮兵力削平之編入郡縣納賦輸租與中土同非威靈之最震疊乎其山嶺雄深川原繚繞伊昔虔劉之始猶可得而言焉夫水西諸酋非真知用兵也徒以漢唐以來襲封席土得所憑依我壓之以兵



則彼主而我客其深箐邃洞易伏也嚴關重隘易守也易于伏則不可以一軍入易于守則不可以一面攻歷觀苗疆用師制勝之由蓋未有不分兵會進而後制其命者明李化龍之平播也以八路進朱燮元之誅安邦彥也檄滇兵下烏撒以防其竄蜀兵出永寧畢節以奪其險燮元自統大軍駐陸廣以當其衝復遣一路由三岔入一路由陸廣入一路由遵義入又別遣奇兵繞出其背以擊之邦彥授首逮我

朝之討安坤也亦以三路會勦生擒安坤于杓箐兵法曰圯地勿戰危地勿攻又曰聚者散之實者虛之我

分兵而合進則彼將有所不支我聲東而擊西則彼將有所不備明王三善之所以失與朱燮元之所以勝非較著者歟且夷性嗜利可間謀以誘也夷性善疑可多方以誤也撫其所勝以散其黨斷其所儲以搖其心截其所通以制其竄此之謂因敵以制敵又豈獨水西之役爲然哉而說者謂今之時累洽重熙諸夷向化咸登習爽而觀照臨惟府屬土城諸夷目訐訟成風未能猝革似宜早爲箝制然夷目之所以敢于爭訟者以吏胥通其聲息也欲繩夷目當繩吏胥使吏胥無所售其奸則夷目何敢踰于法伏讀乾



隆元年

高宗純皇帝聖諭曰使苗民與吏胥終歲無交涉之處則彼此各安本分雖欲生事其費無由洋洋

聖謨旁燭無疆矣今府缺歸于外題爲外郡中最要之缺語曰得其人則理非重其選以期臻于上理哉

水城通判

水城通判在府治西南二百二十五里省城西北四百七十五里明以前爲水西安氏地

國朝平水西屬大定府雍正十一年設通判駐其地以府屬永順常平二里撥歸管轄乾隆四十一年復撥

平遠州崇信時豐歲稔三里歸隸水城增設照磨一員其境東至卜祿塘即岱廳界一百五十里西至落飛戛威甯州界三十里南至撻朗者普安廳界一百七十里北至臭水井本府界九十里東南至阿老河安南縣界一百九十里東北至大石板本府界一百二十里西南至木通河雲南宣威州界一百三十里西北至沙子坡本府界九十里廣一百八十里袤二百六十里乾隆六年始建城其城卑而地下春夏水漲居民苦之乾隆二十四年改建于城東甃以石周二里有奇門三近城數里多平原餘則跬步皆山交



黑南諸山卷二十四  
筆山在城東十里筆架山在城東十五里下鍾山在城東二十里馬鞍山在城南十里鳳凰山在城南十五里上鍾山在城西五里麟山在城北五里滴水崖在城東南三十五里紅崖在城北十五里燕子崖在城北二十里馬鬃嶺在城北四十五里陡箐在城東七十五里以倘箐在城東北八十里縱橫百餘里蒼蒼深翳廳地之至險者也又有者裸箐在城北七十里其東南三十五里爲黑勝關通威甯及本府地山腰懸壁數十丈以木架路容一人行下有天生橋險窄倍于蜀棧又東南六十里爲阿札聖路更峻峭廳

地之至要者也城外有河一道自城西分爲二環城流至城東南復合爲一東流入亂山中城之得名以此扒瓦河自威甯州流入廳西遶廳北常平崇信二里東南流入郎岱廳黃水河由雲南宣威州入廳南歲稔里東南流入普安廳現在成熟田一萬六千六百三十三畝額徵秋糧二千九百四十石有奇徵銀九十兩有奇廳倉實貯各案米一萬四千八百石有奇歲支水城營及平遠州所撥三汛兵米一千八百一十石有奇又每年輓運威甯兵米五百九十四石有奇餘米糶解糧庫學額五名建有鳳池書院平遠



州所撥阿女米獮二稅每年解繳藩庫銀六百兩有奇所屬福集萬福二鉛廠均于嘉慶十九年詳歸西道管理場市七苗有契兒子獮羅蔡家狝家花苗披袍犵狓里民子族類繁多男皆薙髮通漢語頗知耕織改流以前負險自雄時出剽奪爲行旅患今則不敢復肆惟嗜利若渴有隙必報其天性類然土司久革其子孫私稱爲土目者喜爭訟凡官有勾攝必先檄土目會役傳提否則逃不赴案也大定諸屬惟水城爲最難馴其土目之積弊亦更深于他屬臨以明察之吏則尙知儆畏官稍鬆懈則簿牘紛瀆治絲而

琴矣城中駐劄遊擊一員守備一員千總一員把總四員外委二員額外二員兵三百九十六名分防阿札壘汎把總一員兵一百名亥仲汎把總一員兵八十名普撥汎外委一員兵十太名平遠州所撥歲稔里分防歸集汎把總一員兵二十四名時豐里黑勝汎把總一員兵三十名以個汎把總一員兵十五名務卜汎外委一員兵十七名無驛遞渡口北赴大定東出安順西出威甯爲大道僻徑三一通宣威一通普安廳一通郎岱餘府同



黔南識略卷二十四終

黔南識略卷二十四終



